

من جوه القلب

فيه كام مكان فى قلبك مكتوب عليه ممنوع النشر
فيه اد ايه كلام مكتوب انه محظور حظر
فيه كام واوضه واوضه وجنبهم على القمه قصر
فيه شوارع فيها ظلمه وفيه كام حته عصر
اتارى القلب صغير بس اللى فيه ماله حصر
هنا فيه اوضه من كتر الناس ازدهمت
ناس عارفها ومش عارفها ومن كترهم ما كفت
ناس كفتهم نزلت وفى تقلها لكفه علت
ناس عدت و ناس جوه شوارعك دخلت
ناس هاجرت من دقات قلبك زهقت

وناس بقيت لدرجه انها لقلبك حكمة
اوضه مفتوحه ولا فى مره و لحظه اتقفلت
واوضه تانيه اسمها اوضه الاسرار
مسنكره ومفتاحها ما يتعرف له قرار
مكتوب فيها لا للنشر لا لكتابه اى قرار
فيها صور كرهتها محطوطه فى برواز مرار
مذكراتك غلطاتك وساعه واقفه بأستمرار
عقارب الساعه القرصه منها فيها سم وفيها نار
صوره ندم على أسوأ قرار
صوره لطريق فيه غبا الاختيار
صوره لواحد بودان كبيره مكتوب عليها
«حمار»

اما الاوضه الجايه فيها وعود وصلاه وبخور
فيها امل تبدأ عمرك من تانى على نور
وعد لربك وتوبه ودموع ونذور

فيها مقام او ايقونه وشمع بينور نور
فيها منبه یرن ويوعد هكون مبرور
ازای وانت جارر خطايا ومجرور لعالم زور
وترجع تفتح الاوضه (لو) حد مات وعليك الدور
اما الاوضه الاخيرہ هي اوضه الذكريات
فيها ورده ناشفه بين صفحات الكتاب
فيها صورہ لاصحاب زمان ومن حبيبك جواب
فيها ذكرى لحد هاجر فيها ذكرى لحد مات
سابوا سيرتهم وسابوا لقلبي ازما
ازمة شوق ازمة حب عدی وفات
حتى ترابها لونهاضته طلع ترابه مجوهرات
حتة ذهب دخلت ایدی بكل عناد
بلوفر صوف دفی جسمی بس القلب خد لفحات
لفحه برد بتقول يا رتنی ما دخلت اوضه الذكريات